



城北汪氏族譜卷下

裔

孫

讓續編

附錄

表

上譜表

晉成帝咸康二年丙申二月詔天下索譜
淮安侯汪旭上譜頴川晉初陳郡陽夏縣

西鄉靖仁里汪氏
大宗血脉譜

臣旭言臣等千載有幸奉詔品量分別姓氏臣承黃帝之
後玄囂之苗裔周武王弟周公旦魯伯禽之後至成公黑
肱次子汪封汪侯食邑頴川臣四世祖文和漢建安二年
為會稽令因渡江而家焉子孫遍布諸郡無不簪纓以臣
無功蒙用領授護軍司馬丹陽太守淮安侯食邑二千戶

索臣繇來謹治舊譜婚宦職狀詣闕拜表以聞臣旭誠惶誠恐坐罪謹言

越國公奉籍歸唐表

乾坤革運帝王有真據地利之善便者當思天命之攸屬臣本田家強起山谷不忍盜賊戕害生民遂率一方相與保聚伊圖左右率屬歸心故能賑乏室姦鎮安境土撫養黎庶以俟定一今聞應天受禪革命肇基敢令宣城長史鐵佛奉表以聞

武德四年九月甲子

越國公奉詔上譜表

臣華言臣上奉明詔責臣家狀姓譜齊貴賤之由來品宗

源之優劣德懋懋官功懋懋賞臣伏閱舊譜分封創於姬旦得姓始於汪侯枝葉相承代膺簪紱或騰芳周室或著義秦朝冠冕蟬聯世稱良最及漢建安之初臣十三代祖文和膺榮墨綬治任會稽遂遷江左牧守建撫之崇含香沃蘭之望源流不惑代次無疑如臣何功蒙恩再錫信圭授命統軍以備宿衛臣今謹繕寫一通具昏姻職狀進奏以聞貞觀十二年戊戌 月 日

誥

唐封越國公誥

門下汪華往因離亂保據州鄉鎮靜一隅以待寧晏識機慕化遠送款誠宜從褒寵授以方牧可使持節總管歙宣

杭睦婺饒等六州諸軍事歙州刺史上柱國封越國公食邑三千戶主者施行

武德四年九月二十二日中書舍人顏師古行

唐封左衛白渠府統軍誥

前歙州總管汪華 右可授左白渠府總軍

門下前歙州都督汪華等或久經任使或夙著款誠並宜參長禁兵委之戎旅可依前授主者施行

貞觀二年四月五日中書舍人李百藥行

榜諭

國朝禁約榜文

皇帝聖旨裏江南等處行中書省照得徽州土主汪王福

祐一方載諸祀典本省大軍克復城池神兵助順累著威靈厥功顯赫理宜崇敬除已恭迎神主於天興翼祠祀外擬祖廟殿庭省府合行出榜省諭禁約諸色頭目官軍人等毋得於內安歇損壞屋宇斫伐樹木拴繫馬疋牧養生畜非理作踐以致褻瀆神明如有似此違犯之人許諸人陳告痛行治罪仍責賠償所有榜文須議出給者

錄

垂裕錄

越國公

吾少也孤既壯有室今汝母先喪諸子滿前當務孝悌為先知宗嫡為上以嗣以續以享以祀其謹識之汝母錢氏夫人乃湖州長城人諱任生仁壽元年辛酉八月丁酉九

日庚申亥時曾祖諱純祖文強父九隴即巢國公也年二十有二聘于室武德六年癸未二月十三日戌亥時雙生二子建瓌八年乙酉二月十一日辰時生達九月十三日亥時麗氏生廣九年丙戌十月初一日丙辰嵇氏生遜貞觀元年丁亥六月十九日巳亥生遠三年巳丑十二月二十日丙戌卯時生爽五年辛卯四月初八日丁酉生俊爽與俊皆麗氏所生十九年乙巳四月十五日張氏生獻嘗聞生事死葬當盡其禮春秋祭祀當思以時此人子之職也戒之念之母急

碑

宋大司馬汪叔舉墓碑

上即位之三年正月上日始見帝于郊禮成誕敷祭澤曰忠臣烈士節婦義夫墓域之在境內者有司封護如章績溪令臣更考圖乘登源之岡有唐越國公之祖墓叅之汪氏家譜則宋司馬諱叔舉暨其配許氏之阡於越國公為高祖父母也按譜實葬歙縣登嶺前白楊坑東山下績溪故歙境唐永徽始置績溪司馬宋人其墓當在未置縣以前故譜以歙書三月辛卯令謁墓下父老子弟咸在春雨方霽群拜泥潦中俎豆盞竿亦置之茅竹荒翳之地令曰吾之職也不然神明何以塞明詔且越國公之靈久而彌光吏民方襲依賴於先隴可不用吾之職乎先是令鄰州使君浚儀趙公蓋為縣日亦嘗歎茲墓因為亭以表之今

令建安李君某乃欲於四楹稍大其址使時節有事得以
展布簿餘杭使君中立扣之邦人翕然響應營度於是月
壬寅以四月之丁丑即告竣事糜金七十萬粟二萬龠役
夫五百亭修四十尺廣有脩之半輦趙公舊所為亭綴之
於前嚴以扃鐫周以欄楯而榜之以基德之亭又揭是亭
之門曰宋大司馬汪公夫人許氏之墓凡此皆成趙公引
而不發之功以廣上恩意者如此復切惟唐武德貞觀間
號為勲臣者多矣祠廟墳墓今皆昧昧無所聞先王之事
傳記或異重費名卿賢士為考辨今乃圭幣徧六州封爵
越五等雲郎衣冠之歲千載之下過者必式於此可以觀
德矣武德貞觀諸臣一身之祀尚不能永我先王猶及被

聖朝憫飭之典尚延三世非世德之盛何以得此理宗寶
祐五年詔書褒贈故臣華之曾太父母為徹侯小君誥辭
曰福必有基積于前人故流于後嗣爾其富山之基歟歟
之不盈方寸舒之則塞乎宇宙守之不間一息放之則達
乎四海蘊之於身為德及於人為福先王英武中正為德
滋篤仁施之普福流于禩大哉聖謨推其基歸之于厥祖
時趙公實贊書之載告于登源家廟顧瞻其先隴而言之
曰富山之基誰知其上此四世之遺阡乎國家法令典故
贈隧及三世極矣而於高祖則勲典不可及今越三世俱
備卹章而其不可及者乃存其基殆示其積德之所始也
不有以表之無以彰其德此趙公為亭之初事今李君又

從而增飭之而名以基德復故謂成趙公未畢之志而廣
兩朝之恩其誰曰不然復忝系遙胄而居旁邑從兄性實
為郡博士以書徵予銘予不敢辭而系以詩曰

匪基曷考云誰與之嗟彼登源越公之基宰木蔚芳德
之敷蕤薦生越公司馬基之德基此墟越公考之今慰
爾基尚祈高而匪穀來裔為民所依

咸淳三年丁卯五月朔裔孫從政郎復撰

東山忠顯廟碑

祀有功禮也禮有施報通乎幽明神人雖殊其理則一
之事神既盡其至則神之降祥錫祉亦將不得而畱矣故
君子之崇明祀也名稱欲其美封爵欲其尊棗盛欲其豐

潔宮室欲其輪奐凡可施諸神者無不用其至焉所以盡
欽事之誠而為民徼福於無窮也恭惟顯靈英濟王雄姿
天挺智勇絕人屬隋季失御豪傑並起海內淑擾民不真
居王雅以才畧為衆所推爰集義徒保厥鄉井號令明信
威聲隱然歛宣枕睦葵鏡六州土人皆恃王以安免於鋒
鏑及唐高祖興大原王知天命有在挈圖籍歸之高祖嘉
其忠封越國公授本州刺史持節都督六州諸軍事貞觀
初入掌禁旅恩禮有加既没人思其功廟祀不輟至本朝
大中祥符二年始封靈惠公政和四年以忠顯號廟額七
年進封英濟王宣和四年復即舊稱加顯靈前後壘書悉
留登源神祠蓋王所居之遺址也自唐迄今逾五百年威

靈益著封爵益尊別祠之廣遍諸郡邑而休寧獨無歲旱則迎香火於別祠之近者為位以享之已事則徹民無所瞻仰紹興癸酉莆陽吳侯敦仁來宰是邑治人事神罔弗祇畏明年夏久不雨侯仍舊俗禱焉既入即事顧瞻興歎曰此邦之人荷王之休久矣而廟貌不建何以是虔是禱也有應當大啓祠宇以侈神賜且使人有所依怙為福無窮神鑒其衷應若影響不旋踵雨大至枯槁勃興士民忻慶莫不鼓舞鄉之乞靈境外民固慝焉及是皆願出財力以相厥事得吉壤於縣治之東崇岡回環淑氣磅礴歷世知之而莫果用若有待然參考甫定遠近來獻惟恐居後木石瓦甍之屬不日山積工徒自勸靡煩程督經始於乙

亥四月乙酉告成於七月己酉為屋凡五十楹殿堂門廡高明鉅麗於王居為稱儀衛備設威容儼然神靈降依有禱必應雨暘時若仍歲大豐闔邑稱頌皆以為廟成之福而求文於予以識之余謂神之功施於吾民也厚矣歷歲數百而棟宇不立衆雖有志興造莫克成之今也雕甍飛陛創見於茂林翠麓之間而至者肅然謂他郡之祠皆所不及變前日苟簡之習而成斯民蘄嚮之志且迎方來滋至之休侯之勤民至矣是可紀也然余聞民神之主也民和而神降之福侯之所以茂對明神而導迎和氣者蓋有道焉不專是輪奐之美而已也侯之先君子嘗為邑長於斯矣慈祥豈弟視民如子時方多虞兵革未息君外饒師

旅內和民人動皆得宜事笈不濟遺澤至今未泯也侯天
姿既高治術政經復有所授其來也以先君子所臨尤加
意焉故閱時未幾衆已悅服濟美之譽光于前人神之所
以眷顧馮依而降福有繼者其在是歟不然民志未愜而
遽興土木之功以從事於祈禳禴祭之間神將厭其瀆而
莫之省矣其何福之有故余既知其營繕之槩而弁以所
知者告焉後之君子能盡事神之義而為此邦無窮之福
者尚其念哉

紹興二十六年五月初十日金安節記

烏龍山越國公行祠碑記

唐歙州總管越國汪公有廟在歙之烏聊山始貞觀己亥

著于今甲歷代因之號其廟曰忠烈厲邑之人走乞靈無
虛日又各即其地為行祠其在休寧烏龍山者莫知所從
起烏龍據汭川之上琅水東出橫水南下至此而合北流
底于淞溪山形蜿蜒汭流而上峭壁斷崖皆黑色不可正
視山因以名而廟占其勝故其神益靈而人尊奉之者不
懈益虔越公遠孫居汭川者曰永莊以祠出衆力之所成
因時修葺而闢世守之規非便乃以成化丁酉於廟之左
買地為屋三楹置守者居之又割田若干畝贍其用諏日
告于廟下以諭其族與其鄉之人有耆而儒者曰程君仕
儀嘉其志具其事以白請記之石以明示後俾來者謹嗣
之予時方謁告南歸嘗伏拜烏聊之祠得忠烈紀實與前

代之記讀之竊病其叙隋唐之際與越公之事有弗當於心者思有所紀述而未能也則為之言曰煬之不道古未有也弑其父而烝其御竭四海之力以事遠夷委棄其宗祏而荒于禽色殺慘諫士迷不知返故朱子綱目於大業之盜悉以起兵書之而不曰反明人得而誅之也於煬之死曰隋人弑其君廣而不曰帝非共主也誠以天下未有無父之國故討賊之法不得不嚴如此越公生當其時蓋有西向問罪之志而力弗逮乃以一旅之衆仗劍而興全有六州以待湯武之出其德民心如秦之吳芮非叛吏也罪人斯得唐公入關天下之大勢已合不可以逞則奉而歸諸有道使民免于戰鬥死亡之苦其知機達變如漢之

竇融非降虜也出處之正名節之完苟有良史如班范者必將列諸吳實之間君子從而予之矣顧新舊史皆不立傳遂使越公之迹世莫得詳而記其廟者又不能於此是正為公一昌言之乃獨規規於禦留捍患之常與其生榮死哀之末紆其詞婉其意有若為公諱者誠不考之過也仰惟我

高皇帝以胡元竊據中夏起兵江淮復還舊物而即位之初大正祀典淫昏之祀一切報罷微之所存惟越公及梁將軍忠壯程公二廟忠壯當侯景之亂倡義舉兵肅清鄉郡湘東王繹傳檄四方則間道奉表請以兵從卒之賊平而民免于難蓋忠壯之拒景越公之弑隋同一討罪之義

也忠壯之奉繹越公之與唐同一救民之心也

高皇帝考其事而並錄之所以扶天常立人極由一州而推之天下使人凜然知撥亂反正之為功其有關世教大矣豈私于二公者哉二公之子孫半微鄙又蔓延于四方此仆而彼興前屈而後伸他姓終莫之與抗亦有非人力所能為者豈忠勲之家神明之胄天固有以默相之歟永莊讀書好義宗邨稱之此舉尤見其知本非餘子可及士儀與予皆出忠壯後蓋於汪氏有世誼之好云邑人程敏政記

記

重修族譜記

竊聞龜圖啓宇首標紀代之書鳥篆開文先著世家之錄莫不輝洪源於遠譜煥烈祖於前經將二曜以前趨逐四時之節運尋終乃知其始摘葉必識其根較緒粲然可得詳矣軒轅受籙戰涿鹿而垂衣西伯膺符奮戎衣而克受周公復子明辟伯禽剪伐戎夷畀五等之上公監百里馬曲阜分封支子食采平陽汪氏之由實基於此暨漢建安之世祖和位宰會稽百姓攀轅人氏卧轍因茲板挂遂爾淹留流布子孫隨邦建宇或新都築室或宣睦開家遷徙無常宗支漸遠故茲續書譜牒庶得尋源爰自周漢迄于今代英名婚宦罔有斷遺冀萬古傳芳千齡不朽爾開成四年乙未孟冬一日芬謹記

忠顯墓如在亭記

聞之語曰祭神如神在子程子嘗以祭主於敬傳之昭哉敬乎神有可敬之德祭之者有至敬之心對越鑒臨潛通肝鬢則雖視之而不見聽之而不聞真若神之在其上在其左右歛之神惟昭應顯靈英濟廣惠王饗廟食之奉者五六百年矣歸然靈域宅彼近郊尤夫人之所以敬事每歲春祀郡刺史必集僚屬展省其間嘉熙庚子之夏鄭先生來守是邦明年仲春率厥彝典既至其墓瞻庭宇之頽圯念丘隴之荒涼更衣歲事之地亦或之闕慨然嘆曰非所以尊陰靈嚴明祀也為之植萬本之松以專其蔭映治積年之蕪以作其觀瞻於祀之東偏得地之隙近頰方塘

遠揖列嶂築亭其上於是而肅將祭之容飲既祭之福扁之曰如在則知先生之事神也動息皆敬而况端笏垂紳三薰三酌對神之頃乎嗟夫先生敬神之心固即斯亭而可見而先生所以敬神之心則當因斯亭而有攷也蓋嘗肅之公宇禱之祠庭閔雨而甘澤沛欲晴而霽景舒宜雪而嘉瑞降千里之民食足矣而無他邦旱暵之灾安居矣而無鄰境流離之警今蠶熟麥登之後梅霖以時稻畦入種抑又豐年之兆焉庶證之休隨感隨應則知先生無一念而不敬神者實無一念而不在民者為之也後之來者玩名亭之旨思先生之敬知事神之禮當以如神之在為心修而廟貌培而墓木俾一邦之民獲被神之福於無窮

是又先生之本心也可不大書特書以紀其實乎先生名
宙字謙仲吳門人也居仁為門下士於是歛衽端拜泚筆
敬書為之記云

淳祐改元夏至日門生迪功郎徽州歙縣尉兼管岩寺鎮
事朱居仁記并書

藏書樓記

孫元京

休陽為新安屬邑治北有故家汪氏居焉汪氏子弟之賢
曰紹者以秋闈魁多士走京師較藝南宮未捷來遊成均
一日持所謂藏書樓之卷示予曰樓之建若干楹其深若
千丈其廣若干尺創始於吾先君仲圭有年矣大夫士游
于斯登眺于斯者覽其遺跡仰其高風莫不謂宜表而出

之以示子孫不忘其先之意第未有為文以發揮其事者
願先生有以誌之予曰善哉子知先君知所以遺子孫之
道也世有厚積篋篋以遺之者然篋篋有時而盡費有廣
求田園以遺之者然田園有時而他屬惟教之以學則可
以用之於無窮是以自古有志之士莫不以學為子孫教
也然非積之以書則所學無從而可博此藏書之樓所以
作歟吾想夫斯樓之上先君之遺書具在將有盈几而堆
案也插架而滿匱也經史子氏傳記無有不可備其觀覽
者焉古今名物書畫無有不可資其玩好者焉子日居其
中將必曰先君之所以藏此書者將以遺後人也吾其可
不思所以講而習之乎又必曰先君之所以使吾講習此

書者將以承其家業也吾其可不思所以繼其志而述其事者乎於是朝而習焉莫而修焉苑囿而漁獵焉必欲使業無不精行無不成此先君藏書之意而今日有待於子者也夫樓之創非難而嗣之為難書之藏非難而讀之為難先君作樓以遺後人而子能嗣之先君藏書以教後人而子能讀之豈不謂之賢子孫哉予嘗怪近世以來潤屋豪家往往鞠為荒烟冷蔓之墟章甫縫掖多變為黃冠草笠今汪氏之家衣冠引翼顧久而弗墜如此何其美哉予以是知其先君遺子孫者有其道而世澤之流長者有所自也使而後繼子者亦若子之克繼其先君寧不愈久而愈昌乎雖然子今亦游太學而太學之書萃天下之所有連屋而充棟有不得盡觀而盡閱者子見之必大協其志矣藏書乎哉

樂道堂記

張日孜教諭和

道者日用事物當行之理皆性之德而具於心無物不有無時不然窮天地亘古今人之所共由者也是故善求其道者如鑿地得泉無所往而不在也視聽言動之合其禮道也喜怒哀樂之中其節道也出入起居之惟其時道也以至於事父從兄之盡其敬親賢取友之竭其誠尊主庇民之殫其忠與夫典章文物之備為禮樂法度之振舉亦何往而非道乎故子夏論君子之道不出於灑掃應對之末孟子論堯舜之道不出於事親從兄之餘然則是

道也不必求之於希夷恍惚而必循其性之自然雖曰人所共由而有溥博淵泉者寓焉雖曰日用常行而有高明廣大者存焉是以能由斯道者則為聖為賢不能由斯道者則為愚為不肖也於戲斯道豈可不由乎哉予友休寧汪永昌氏知斯道之深行斯道之久不徒知之而又能行之不徒行之而又能樂之雖然於日用常行之際怡然於人所共由之路惟其習之也熟故其悅之也深惟其行之也久故其樂之也大是以無一毫私欲累於中而有萬善備於己可不謂之君子者乎將見道明德立進而為當時之用上而事

君下而澤民則斯道周流而不窮運用而不息而為聖為賢皆可跂而及也豈惟聖人得之哉永昌既能樂斯道矣然予猶有以告之中庸曰道也者不可須臾離也可離非道也永昌尚勗之哉

蘿山清隱記

應諤教諭
天台人

蘿山清隱者休寧汪君世祥所居之號也其山在治北半舍許世祥朝夕眺望覽其秀挹其清故名以此暇日過予泮水之上徵文為記予交世祥雅非一日弗克以老悖辭乃進世祥而問之曰凡隱者不偶于時不得行義以達道或韜光晦迹於窮約或放情適意於閒曠若冀缺龐德公隱於耕稼張志和陸龜蒙隱於漁釣漢陰老人隱於灌園夷門之徒隱於抱關擊柝陶弘景隱於仙賈島隱於浮屠

老聃東方朔隱於吏劉伶阮籍隱於酒長沮桀溺荷蓑丈人又果於忘世而不知返要之聖賢之道固皆未合然所以求其志亦各有在余見子之尊人承先世詩書之澤沐聖朝太平之化耕桑可以給衣食子孫足以應門戶殺羞足以娛賓客藥石足以娛性情勝日則葛巾杖屨逍遙夷猶以自適於山水之間安貧樂道素位而行未嘗以隱自處非若昔人高蹈遠引流連光景迷而不復者比今子年力富盛有學有藝有為有守固將為世用也奚取茲義也耶世祥曰彼長往而不返者固謂之隱矣而潛藏以自脩者亦有取焉何也余聞而嘆曰有善人哉冥棲幽遜者不足與語至道而干祿冒進者又非君子之所取抑非媚學之士血氣方剛德性未定不能不奪於聲色貨利必也耳有所不聞目有所不見意慮有所不及然後氣冲而志一以達三才之情以會萬物之理以極往古來今之故德庶乎其廣業庶乎其崇語不云乎隱居以求其志是也予又聞汪氏望於新安世祥越國公之系簪纓相望代有聞人其居養與人不同故其所得蓋有超然獨出乎塵埃之表者予故為之記使知世祥者非沉淪之徒也

杏莊記

汪君廷佐世居休陽之城北曾大父永昌號安貧先生大父世祥號蘿山清隱父思和號遯軒相承業醫廷佐讀書尚儒恪守先訓而尤以醫擅名所居有莊四圍樹之以杏因

號曰杏莊士夫為之題詠乃哀集成卷徵余為記余惟杏之為物於人亦無所不宜者也其花也烟鬚月藥足以供人之清玩其實也酒香橘色足以飫人之飢渴其仁也入藥調餌足以療人之病疾故董奉居廬山治病之重者種杏五株輕者一株而又以杏易粟賑恤貧窮致有董仙杏林之稱而識者知其用心之仁也廷佐名莊之意其有見於此乎夫存心以活人非明於醫者弗能廷佐深明於醫嘗聞其療疾也不泥於感疾之常而必求其隨時轉換之變其用藥也不拘執於古方之正而必參之以已意之奇其拯人也不乘急以索人之利而惟欲以全人之生故於人無不醫而所醫者無不效其存心之仁濟人之功殆將與昔之董奉異世而同符者也杏莊之名不與杏林之稱並著乎雖然心之仁者身必顯仁之活人者後必昌廷佐以醫而活人者多矣他日為之後者集杏園躋顯仕使鄉人稱曰廷佐之後有如是者其業醫之仁深且厚也不亦大有光於杏莊乎若以杏易粟而濟窮在廷佐必能加之意也有不俟於言

弘治戊申夏六月望日

中順大夫廣西慶遠府知府登源宗人溥記

淵源錄序

廉希貢集賢大學士

聖人制禮莫大乎宗族宗族之辨莫重乎譜書譜書之傳莫先乎宗法故有百世不遷之示有五世則遷之宗祖遷

於上而宗易於下祖宗之傳序人道之本也古者系本之錄小史之官所以定世次之承辨昭穆之列俾後之子孫知其宗族之所由來支派之所由別聯疎以為親循本以追繫莫善於譜矣後世宗族之禮不厚而數世之下相視如途人其又何能推同姓之宗而知所先後者哉汪氏之初別於東魯傳記可稽焉後裔實繁散而之四方者蓋莫之聞也於是汪芒合於汪錡晉絳混於平陽子孫能言其先祖者稀矣世傳七十有二而其裔孫松壽始翻然發憤思推究其源凡百氏之書文諸家之記錄塵編絕簡無不窺也次始姓祖迄于今代固有斷遺既悉為註釋且著辨論贊說更相發明向來糠粃稊稗之云覽者渙然若冰消而凍解矣非惟其宗族之有據揆於世教亦不能無裨焉是可嘉也故序而書之

安樂集序

張日孜

予友汪君永昌安貧樂道大夫士嘉之為序記論對及詩歌稱頌其美積而成集請予題名予合二者之說名曰安樂集既名之矣復為序之曰安者以其能安於貧樂者以其能樂於道夫能安貧則能樂道能樂道則未有不安於貧二者人所難能而君能之非有得於古人之心者能乎觀於是集則君平日之賢可知矣君素號安貧子而上清西辟張真人序之曰非有卓然之志確乎其不可拔者不能一日安之也前儒學教諭三山林思和記曰貧至難安

能安之則道充德弘心無愧怍訓導四明樓穆中對曰生分既貧矣知其分而安之可也會稽徐端蒙論曰將安於所性之天乎舍性分之所有而外求以安之乎予觀四者之言雖規頌有不同不過欲其安於義命而已君又名其堂曰樂道徵教諭廬陵張日孜為之記曰是道也不必求於希夷恍惚而必循其性之自然使惓然於日用常行之際怡然於人所共由之路而為聖為賢皆可異而及也斯言也又所以進君樂於當然之道而已耳嘆夫文者貫道之器不深於斯道不能言也是集辭嚴義密論高意廣若韶濩奏而聲音和豪漕試而光彩露是皆一時之傑作足以感發人之善心懲創人之逸志非誇多聞靡者也至於

群公酬謝回復之作又有出其意表者君宜寶而藏之使後人觀覽於斯則善心之發又未有不能安貧樂道也哉詩曰維其有之是以似之又曰子子孫孫勿替引之如是則斯集不為無助於君矣予與君交莫逆因其所請故執筆僭序群公之作於篇首

贈醫隱汪世祥序

景泰丙子春三月既望縣幕劉侯謂大曰休之為醫者衆未有賢如汪世祥者吾自到任將載考凡各衙長幼疾瘍皆服世祥藥無一不效者去秋以事朝

京師家人偶感氣厥舉室憂惶夜半扣世祥門倒衣來視曰斯疾可療藥未終劑而病除吾感其惠報以金幣不受

吾有愧色而世祥無德容非醫之賢者乎子邑之能文者願一言張之且識吾之感與不能報也越二日遣壻謁予鈍齋促文世祥予素所敬者其何以辭夫醫之道自炎帝嘗百草以啓其端軒轅岐伯內經靈樞以發其微至周而有醫師掌其政令稽其醫事察其疾瘍眡其死生兩之以九竅之變參之以九藏之動攻之以五毒養之以五氣療之以五藥節之以五味其法明而備後之業是者至方不能加矩至圓不能加規焉世祥唐越國公華之裔世居城北為儒家其尊府安貧先生永昌公以道自高不妄與人交常積藥以濟危困不責人報君子稱之世祥繼其志謹言慎行重光先業扁其軒曰松蘿清隱間居焚香檢書灌

花種藥以自適視世之利欲不翅塵垢及遇知己講古今論道德豐豐不倦士大夫莫不樂與交歡然其胸中自得之妙則有非他人所能窺測者若治病必究運氣用藥必法君臣如庖丁解牛逢蒙中的者特其餘事耳嗟夫士之不偶于世者必高蹈遠引託物以自晦然後志不外慕而情有所適若扁之於輪任之於鈞秋之於奕是也矧醫有提挈天地把握陰陽回生起死轉夭為壽之功乎故其所託又多有道之士如扁鵲華陀孫思邈董奉輩是也世祥生于

盛明之世懷寶不售視董之居廬山孫之居太白奚以異哉夫施惠於人而不責報急於利者之所難而有道者之

所易人雖不能報天必報之責於人者有得有不得責於天者無所不得也若世祥能責於天者歟其有道而隱于醫者歟是宜書侯世家歸德居官愛民他日政聲積著起登華要薦賢醫 國舍世祥其誰能終于隱哉既敬世祥之為人而重侯之請書以為序是月庚寅日邑人蘇大撰

贈汪公應祥序

錢塘吳宗富來游浮梁將二十年讀書能作詩誦文章獨以岐黃之術鳴治北有都曰長安其人多談今古識道理非庸常者能瞽惑宗富居之久愈致人敬重遇病隨投而應未嘗窮北里人朱志高往往為予道之一日子致書問其術何以能妙如此因復曰予術何足道先生所欲問汪

公應祥其人也公休寧人性謹厚代以醫為業開藥室通衢中所蓄水陸遠近環異之味無不有且讀書能以理斟酌其術故所契獨精所用獨神士夫搢紳四方之人來求門如市舟輿之迎駟巷渚貧者哀籲于道君悉應之無難色無二價遠近老稚婦女皆知其名咸稱汪公云公四子皆儒醫曰讓習舉子業遊邑庠上下推重先生能通問必有所復吁予用心於此二十年其書無不習而通之其微若有契未敢是良師在即可自棄乎竊聞人者天地陰陽之會身之所具莫非陰陽之氣而已夫得是氣以生亦由是氣以病然病有標本有內外有上下有奇恒當切其脉視其色察其神氣形志審其陰陽參五相合而知其所舍

或治其俞或治其合或治其經井榮谿谷之分筋骨膚肉
之部四時之施各有其當九鍼之法各有其宜虛者實之
盛者微之暴者奪之脆者堅之不足補之有餘折之奇之
偶之緩之急之上之下之順之逆之正之反之治極於一
隨應而動吾所得者如此未審合其微義之萬一否宗富
尚以此質之汪公惠然有告當列之

大廷布之天下以蘇疲瘵殘疾之無告者
天順甲申秋八月朔鄉貢進士浮梁戴琥書于青峯書屋

松蘿書屋序

休寧汪恭築室松蘿山收集古今圖籍修息其中以資聞
益扁其楣曰松蘿書屋介錢塘吳宗富求序其事宗富以

軒岐之術為予識四三年前曾道汪君應祥醫道之精善
行之多而以言通之矣是則恭之父也繼而按歷徽歙見
縣博弟子汪讓者豐資多學進而與之言矣是則恭之弟
也雖未見其屋之容受規度及積書多少之詳而其志可
考也遂不辭而為之言曰君子之所貴者學也學非書無
以遂也上古聖神以身示道斯民從而由之不自知也及
周之衰教化大壞孔子身斯道不得位以施諸人乃筆之
於書以示教凡所以治天下國家修身正行之法無不具
焉顏魯思孟之徒相與誦習而傳釋之不幸火於秦自漢
以來儒生學士收拾散逸於煨燼之餘類集古訓卷帙愈
繁旁及國史醫卜種藝之書遂至充棟汗牛矣天子不學

無以平天下諸侯大夫不學無以治國家士庶人不學則行無由正而莫脩其身甚矣書之有益於人而不可以不學也積而不學者有矣不積未有能學者也予由是又知恭之能學也蓋其所積非前人之所遺也方今治平日久人皆務學非散金不足以得書且聞松蘿休之負郭名山也其沃厚足以樹藝而收利其幽致足以遊玩而適情夫不費與收利而適情皆人情所大欲也今恭散金以收書而又棄沃厚幽致之地築室以居之苟非其志之所存又有甚於此者抑何所為之不類如此哉予是而又知恭之能學也恭能學矣亦盡知學之之法歟畢力以踐其說平心以繹其理反身以體其事如斯而已矣恭學而有得也

記曰幼而學之壯而行之予聞恭之與讓也其器宇也其識見也其行已也皆兄弟也他日翩然並出推所以致用堯舜

君民沛澤當時流芳後世於書屋將愈有光也豈常情淺淺者所能涯涘哉豈常情淺淺者所能涯涘哉

成化七年正月二十五日文林郎南京監察御史浮梁戴琥書

雙清圖壽汪克敬序

汪氏世居休寧北城者自歛徙其先蓋出唐越國公後與元尚書文節公族相近世居樂而尤以製墨聞邑中四方人之來者非汪氏藥墨不售曰恭克敬君者益以其暇日

讀古聖賢書非其業弗之修也樂交一時知名士非其人弗之友也構屋松蘿門下題曰松蘿書屋蓄書數千卷日誅歌其間非可踐之地弗之往也其為人如此故予兄弟與之善而莫逆恒相語曰子之藥足以濟醫而壽人之身子之墨足以濟儒而壽人之心之二者有功於人非一日之積也子之壽將無與之同乎成化癸卯春予北上京師族弟宗弼實君之婿告予曰明年七月君壽六十謹繪松竹為雙清圖寓慶頌之意請一言序之未暇也則又託人尾舟至姑蘇少間乃為之言曰凡植物之難老者蓋莫如松竹非一時早發先萎者儼古人率取象于壽而松之堅貞竹之勁直排風雲勵雪霜有不可犯之操古人亦比喻于

德若孔子稱松柏後凋而詩以竹美衛武絜可見已宗弼所望於汪君之壽之德其有取於斯乎德者壽之基也德厚則壽益增矣夫孔子大聖老猶玩易三絕韋編衛武睿聖年九十餘猶作抑戒以相箴儆古人年彌高德彌劭如此汪君易之將無忝于文獻故家之裔而足以副斯圖者哉汪君父應祥處士年八十為鄉大賓弟讓克和治春秋為國學上舍最相孝友成于家而見重于鄉評其世德固有所自而君之壽必有以副斯圖者矣是歲三月廿六日賜進士及第奉直大夫左春坊左諭德同修 國史 經筵官兼

太子講讀官同邑程敏政書

汪氏譜跋

世教之立必先乎立宗法宗法之制尤重於譜牒所以輯之者紀氏族之從來而為世教之徵也汪為江左大族其先出自蒼姬為汪侯生而掌有汪文因以為名長而食采穎川子孫襲以為姓居于平陽故曰平陽汪氏春秋時有童子錡執干戈衛社稷行著麟經秦漢而下才傑迭出龍驤將軍文和南征而家于歙晉淮安侯旭上譜表以列國柱隋末世華保據六州受唐封爵九子皆侯鐵佛為從兄弟功高位顯自時而後子孫散居四方有居池陽嚴陵饒睦而歛尤盛是可尚矣今觀是譜有源流有支派珠聯璧映玉瑩金明使昭穆之倫親疎之別世次之傳宗盟之集

實有所本誠宦家名望之閥閱也其於世教豈小補云為

汪氏之後者尚宜勗諸

文和為奮武司馬稱龍驤將軍蓋因舊文而未華也

金華宋景濂序

忠烈廟唐宋元誥勅碑跋

右越國公誥勅今富山忠烈廟所藏也按記實公新安登源人英特有武畧當隋季保障歙宣杭睦婺饒六州民賴以安唐興公知天命有歸納歙歸附高祖嘉之武德四年授誥與圭太宗貞觀二年又授誥與圭二十三年薨於長安歸葬歙北雲郎山邦人追慕功德立祠祀之自是護國庇民威靈烜赫有司以實聞宋真宗大中祥符二年徽宗政和七年宣和四年孝宗隆興二年乾道四年寧宗嘉定

四年理宗淳祐八年十二年寶祐二年六年恭帝德祐
元年元順帝至正元年褒封誥勅共一十二通夫人錢氏嵇
氏龐氏張氏上自三代下及四弟九子并婦長孫十從神
共誥勅四十二通

國朝初定江右神兵助順蒙

頒榜以嚴祠事洪武四年封越國汪公之神命春秋祭祀
其歷代誥勅俱載紀實獨唐二誥二圭宋寶祐德祐二誥
真軸尚存計自武德四年抵今凡八百三十九年幾經兵
燹而不毀者豈非神靈守護也歟遇以凡庸叨守斯土嘗
以災旱禱祠下因覩誥圭真蹟遂憶宋范公鍾守徽曾刻
是誥于碑惜乎湮沒不存迺謀諸同寅同知陳斌通判宋

敏推官蒙正命儒士鮑寧張達鄉貢進士帥慶依四誥二
圭形制摹寫鑄碑立于廟左字有漫滅者以圈代之其餘
十通依紀實謄寫鑄碑立于廟右庶使後之觀者知神之
褒封有自又有以見唐宋誥勅之體云時

天順三年歲在己卯仲秋月吉日

賜進士第食正三品俸直隸徽州府知府福山孫遇謹跋

贊

汪王像贊

越國汪王處心忠良施偉烈而保障六州著名譽而感慕
萬邦噫既佐唐朝之主復助我
祖高皇宜其饗祀無窮以增先後之光

遼王贊

續汪氏譜贊

猗歟汪氏華胄遙遙允文允武顯于歷朝至漢文和乃從
孫策渡江而南始家於歙四傳曰旭晉成帝時撰次譜表
詣闕奏知逮叔舉公仕宋司馬避地登源四山列畫粵惟
四世生英濟王六州奄有籍土歸唐九子聿興鸞翔鳳翥
立功襲勳為國之柱慶源演迤如江如河承其的派澤其
餘波元和之間有名淳者裴度行軍寔參謀也下延五葉
篤生文昌祥符癸丑一破天荒特被殊恩拜官學士職掌
絲綸獻納稱旨書香郁郁宗敏克承饒州刺史綽著才能
直閣德彰丁宋之季兵變相尋身將安寄徃依外氏休之

北廛扶老携幼卜此居焉厥孫紹公少負所學遂魁省元
未膺峻擢天與其子出守鳳陽終于官所扶櫬故鄉入元
曰群文章高古以詔子孫嘗修宗譜安貧處士在
國朝初高風邁俗仙中之儒屈指始遷二百餘禩秀發芝
蘭陰連橋梓匪惟裕後抑亦光前重續家譜以永其傳
汭川程隱述

安貧先生像贊

軀幹秀挺識量寬洪雖栖息在市廛之內而動靜有古人
之風清心寡慾正養顓蒙聞善則行惟德攸崇見為不義
若浼厥躬樂道安貧廣濟痲痲游藝苑以怡情竒妙探乎
化工樂雲林而寄傲長嘯吐乎晴虹斯人也殆所謂皎然

獨立蓋將與赤松而相從者邪
休庵教諭天台應諤撰

清隱翁真贊

眉宇龐然無趨取之態衣冠朴古有恬淡之風推三世之
妙傳人比之為良將致羣情之感慕自不以為陰功鶴髮
酖顏衍七旬之壽松風蘿月儼千古之蹤噫生乎今之世
而能與古人同豈非後胤之賢無忝爾祖之越國公里人
程文通贊

簡翁真贊

襟懷春盎器宇冰清得失不關於喜戚修治蓋出於忠誠
隱處市廛介八旬之壽周旋禮樂享五豆之榮桂蘭秀發
德業豐盈藜杖幅巾儼商顏之皓首蟬衫麟帶真洛社之
耆英噫若公者足可敦一時之俗庶幾流千載之名城南
蘇大拜書

遜軒像贊

其性恂恂其儀肅肅蓋內剛而外腴故神安而氣淑迹不
溷於塵囂心更忘乎寵辱躅彼前修拔乎流俗濯纓掬紋
水之清采藥步蘿山之麓子秀孫賢書香郁郁噫天將篤
之以耄耄之年而享林泉之福也歟宗生歲川汪琳贊

熙菴贊

觀其克之溫可以占其中之所存即其德之淳可以卜其
後之必振信義孚于里閭之間而足跡不遍權勢之門惟

散步於寬閒之野舒嘯傲於寂寞之濱弄紋溪之明月眺
松蘿之白雲考其所居蓋

盛世之逸民也耶太平黃綸贊

汪克敬行樂圖贊

此汪君思恭之像也其氣平而不傾其容舒而不肆負雍
雍善俗之姿抱耿耿活人之志市隱無羨乎巖棲孝友不
煩于祿仕其向學也庶幾有手不釋卷之勤其制行也可
以為足不履影之事惟顧名能愿而恭知享福必昌而熾
非有暴于先正之高風而為太平之逸士者歟

太子講讀官同邑程敏政撰

愚菴像贊

容貌之莊本乎心之正也言詞之確本乎德之成也其於
人也無苟合之行其臨事也有先見之明攻醫藥以濟人
之疾樂觴詠以適已之情斯人也可謂能充其所守而繼
前烈之休聲也哉歲川汪琳贊

書

唐高祖賜鐵佛墮書

皇帝敬問新除六州總管府長史宣城郡開國公汪鐵佛
卿昔經離亂備嘗艱險戮力協心緝寧士庶中達機變遙
布欵誠念此誠為嘉歎朕君臨四海撫有萬方事資英傑
期安撫兆庶彼藩襟帶統攝不輕元僚之重故以相授宜
善加綏衛務立功績使鍾鼎傳業竹帛流名首冬霜寒比

無恙否家門大小想各平安故遣使往宣旨意仍寄信物以示朕懷

四十三代天師西躡真人與汪永昌書

端書奉復昌齋隱德先生尊久契伏自戊寅歲得聆誨益迨今倏爾三十餘年檢沐交厚而翹企之私未嘗不在春樹暮雲之間往辱惠書值冗於匆迫弗果治復為欠禮也渴中復辱雲緘遠審文候清勝德業茂加喜慰喜慰且來書詞意淵邃雅愛過情披讀之餘如展良覲而傾懸河也區區近自朝回抵山老病日駸其碌碌終歲筆墨刊落餘無足為斯文道第憶曩昔相與握手傾論絕無塵想其嘯傲煙霞枕漱於風泉白石之趣未知何日可計其復能然矣臨楮不勝悵惘茲特布此以復辰中秋氣方肅尤冀若時保愛以需良悟不備穿頰首

狀

簡翁行狀

公姓汪諱應鳳字應祥號簡翁休寧城北人系出潁川侯汪之後三四遷始家于此曾大父群字良佐大父忠澤字澤民皆隱德業儒父廬字永昌樂道明醫毋柳塘劉祐卿女婦道毋道俱有足稱兄雁麟公為支子端重謹教忠信不欺樂善明醫孝友于家人無間言內而宗族外而鄉黨又外而江湖之間一以和處之至如家僮小子無不皆然聞有善言善行好之甚於好利其見不善則怯然避之年

十四早克自樹父命之曰吾家昔裕甫長弃之務醫與道
自甘澹泊以酬吾志今汝少長何不力於治生以濟日用
於是東出吳淞南遊婺饒如風霜嘗險阻歸而開桑室于
通衢數十年間經營積累少口園建居第置曹川吉地期
安於親立松蘿莊所以供伏臘僮僕輩生則屋居之沒則
地瘞之凡戶庭之需可謂足備姍族間有孤孀者擇名族
為娶焉窘者授以治生之道翼之又如余宗汪士和俞天
貫江乞數十人貸其值不能償遂焚其券與凡見人饑寒
疾苦則量力拯之道路橋梁間亦修治焉於其子皆為盡
禮延賓以教之嘗訓之曰家於吾先君時雖未振而德業
之積累實勤吾所以能裕於斯者食其賜耳汝曹寧不勉
諸諸子承命皆務本節儉各克自效又嘗曰藥物濟人為
德斯小豈若政教之及人邪况簪纓吾家故物舉之在人
幸有諸子足為幹蠶乃遣子讓為縣博弟子授春秋習舉
子業屢試秋闈未捷徐戒之曰汝志雖少挫豈主司之不
明邪亦惟業之未精德之未進愈加淬礪可也年既耆艾
行不馮杖日以德義課諸子孫或時命僮僕製陳玄以濟
文翰家庭之間雍雍然僮僕訢訢然縣大夫顏侯紹宗李
侯瓌每鄉飲即以大賓禮下之江西御史戴公琥知府程
公績嘗迭為文贈之其見重於人不容釋口咸稱汪公云
一日疾病居于正寢從容語諸子曰死者人所不免惟生
無愧於時則雖死寧也今幸無愧矣汝曹其識之言既而

逝享年七十有九生洪武壬申四月十五日辰時沒成化
庚寅十月二十六日辰時娶城南茂族繼宗夏公女德性
誠一婦道克修叔世先往子男六人長顯真甫冠而卒次
理真娶金氏次朝真娶吳氏次志真娶邵氏又次義真即
縣博弟子讓娶李氏其季惠真早喪子女一人適鶴山朱
彥章侍郎晞顏公裔孫也孫男八人澧澗激潛澗澹沂淇
孫女七人景通於公子讓為同志公之素行曾熟聞之敬
授筆為狀其平生歷履之實鑿鑿為人所見聞者如此邑
人方景通狀

墓誌

簡翁墓誌銘

簡翁汪君既沒十有五年其子理真含哀告曰先君葬已
久墓向未有銘理真今六十有三不及時為誌之異日何
以見先君子地下謹以狀請幸畀之銘終身無憾夫終者
人所易忽遠者人所易忘子於其親能無所忽忘如此厚
之至也奚可以辭按狀其先系出潁川侯歷三四遷始居
休之城北城北之祖宋季直秘閣公德彰也德彰四世曰
群字良佐生澤民澤民生安貧先生廬廬生簡翁理真父
也諱應鳳字應祥簡翁其號幼忠誠長益自樹居家著孝
友之行樂善惡不善和以馭衆勤以率下黽勉生業能裕
其家於前又能推有餘以周衆招延儒碩使教諸子恒誦
先德為子孫勸又責子讓學古將入政以昭先德以廣仁

愛宜其幽則鬼神默相明則人所器重一日疾病諸子羅
列正寢誨語諄切而訣成化庚寅十月二十又六日也享
年七十九是年冬十二月二十七日理真承治命奉柩葬
于曹川與配孺人夏氏同域然夏先君二十年卒于六
人顯真甫冠卒理真朝真志真義真即讓惠真早夫女一
人孫八人孫女七人嗚呼克家如君者其年不足錄享年
如君者其德不足稱今君兼有之而子孫又皆賢可尚也
已故為之銘銘曰

蘿山蒼蒼維德同芳紋水浪浪維澤與長肯播肯堂于先
有光曹川之岡以求其藏下瑞生祥百世彌昌

成化二十年龍集甲辰十月初吉邑人汶川程隱撰

祭文

奉安錫封告命祝文

維淳祐二年歲次壬寅正月甲申朔十四日丁酉朝請大
夫知徽州軍州兼管內勸農營田事鄭宓謹以清酌之奠
昭告于

昭應顯靈英濟廣惠王本州頃聞于朝乞加封王祖考妣及
王之夫人王之二弟王之九子夫人程任二神茲拜綸命
敬用奉安國家褒賞以報有功厥功既懋所報益隆幽顯
罔間惟實之從雖沒猶存傳之無窮惟忠顯王祀遍江東
烏聊有祠於赫靈通或征或戍陰護我戎欲賜欲雨默相
我農轉災於危變吉於凶六百年間偉我顯庸其在有唐

全楚封公我朝廟額曰顯曰忠徽稱八字既昌厥躬繇親
及嗣恩淫浸醲稽之僉論報猶未豐皇祖皇妣慶源所鍾
仲氏季氏佑助協恭曰嬪曰婦德成肅雍爾輔爾佐力罄
彌縫邦人來告聞之九重鑠張揚屬感動宸衷徹侯之號
小君之封列位允八膺寵則同告藏祠宇黃燎幽宮吉蠲
一觴踰想英風永福茲土益彰神聰

祭曹足軒文

汪莘

嗟嗟子美其窮抑至此邪其平居破牕敗壁而其死又必
於道路邪彼老於牖下者又何人邪所謂天道是邪嗟嗟
子美其窮有如此邪其幼也孤之其壯也鰥之其老也獨
之其死也客之其子也人之子也將以待其死而及其死
也不得見其子而死邪彼侍妾滿前子孫環列者又何人
邪子美之死於道路也以待補國子行而其死之地則昌
化縣之西十里去故鄉二百里已抗義決策欲火子美而
歸其骨者子美之族人也賻之金加之糧護之吏全其骨
而歸者子美之族人試於南宮者之謀鄉中金奏院以其
狀入急遞而昌化賢令尹章其姓伯奮其名者之惠也於
此又足以見天道之僅有存者此予所以始聞之而悲以
歎終聞之而慰以悲也若子美者其守已近於介其混俗
近於和其有志於世近於大其留意性命近於遠此予所
知也予自少與子美友善其於利害出處悲歡得失所不
可與衆人謀者惟與子美謀之以子美之能慮而不以我

為市也其於學業論議文章歌詩所不可衆人言者惟與子美言之以子美之能知而不以我為誇也其於天地鬼神性命仙佛變化所不與衆人知者惟與子美知之以子美之能信而不以我為誕也子美死矣有類向之所謀者今孰與謀之有類向之所言者今孰與言之有類向之所知者今孰與知之耶方予居鄉時與子美無時不相覓酒不計滴醇醑不計薄厚見必飲飲必醉歌呼淋漓起舞相屬其間倡酬響應雜以詆諧以至放言所到上闕青天下入黃泉遠斥八極細入無間意見相得目空四海何其豪也一旦盜起蕭牆予挈家東下子美來訪別言各寡而音硬視俱凝而淚流又何其可憐也自予居中都一年書問兩隔去年春始克以詩二絕寄子美而子美書亦適至其夏以書往來者一其秋以詩往來者一焉春之書詢予以出處去就之宜而其詞憂夏之書諭予以貴人召見事雖不知予進退之故而默諭其義而其詞直秋之詩想予湖山之樂欲相從以論出世之法而推懷抱之無窮而其詞思今年二月間以書來字不滿三行自言吾不喜監試而喜見叔耕而其詞決孰知三月之暮未至而道死既死而予歸則子美終不得見予予終不得見子美矣豈知當時之別遂為千古之隔邪去年冬夢子美誦所作詩止一句曰東風流不日銜山予覺而念之殆非佳讖而子美果以今年春莫死豈非二人之心莫逆而精神之相感通邪死生

壽夭先後遲速同歸泯滅獨念予與子美相知之深相與之厚相信之同而予出處晦明之故精忠勇義宛切深苦之言與夫大丹性命玄明微妙之旨予之所欲告有待而未及發子美之所聞有問而未及答者今皆已矣可不惜哉嗚呼士大夫無慕於道義而道義之士窮無慕於事功而事功之士窮無慕於文學而文學之士窮予閉門而無侶出門而無路獨得一窮人可與開口如子美者而子美又死矣使予當終身畏默避忌以待盡於鄉曲予既悲之死能不自悲其生邪子美死有予哭之未知予死有何人哭予予悲子美且自悲故詞不能文而姑叙其情以哭子美有酒在樽有肉在俎嗟予子美一朝千古

詩

漢北地王謚

以下絕句

汪德彰 二首

君王奉璽出降時極諫無何節不移先廟哭歸甘自斃芳聲千古起人思

梁元帝繹

效死危邦道莫如却將圖籍火無餘明朝啣_甘降虜蕭繹何曾識讀書

齊雲巖

汪瑄

齊雲疊疊貌崐崙百折羊腸繞石門拭目縱觀心自豁恍然別是一乾坤

吳季子札

汪午 二首

延陵季子古遺賢讓國高風百世傳附節子威更產龍不知聖道可行權

宋文帝登石頭城覘魏兵有歎

啓譽真由白面生北來誰禦佛狸兵始知悞聽讒人口壞却防胡萬里城

雲嵐王陵廟

尤藻

凍雀山頭生樂盡朱温惡極少陽危雲嵐王氣無今古愛比甘棠發永思

又

唐元南軒山長

虎戰龍爭天地老林深塚閔鬼神幽英雄不是知機早奈此雲山萬木秋

古城廟石壁

汪澤民文節公

煬帝南遊四海兵石門憑險待時平至今萬歲山頭廟猶有居民說古城

張中丞

汪燾四首

堅守孤城百戰勞汪淮捍臂賴雄韜當時賣虜忘君者握節誰知有袞褒

許睢陽

甘下寧陵授柄時孤城死守有誰知可憐李翰不為傳徒使英雄千古悲

南霽雲

突圍乞授兵賀蘭正爾嫉威聲毅然斬指明吾信還

向坐陽待賊烹

雷萬春

賊逼危城據守難英雄正此死相安面中六矢渾閑事千古聞來膽亦寒

安貧自述

汪永昌

世事紛紛假作真靈臺虛澈本無塵安貧樂道隨緣過莫學亡身殖貨人

綠照亭

汪溥慶遠府太守

逶迤芳徑草萋萋四面青山枕碧溪綠照亭中風景好古今遊客幾留題

又

綠照幽亭舊復新消殘多少往來人眼中不改尋常態只有溪山歲歲春

逢監澗元

汪良臣御史

汨汨驅馳不自由弟兄離隔幾春秋相思常作少年夢豈料相逢盡白頭

松蘿書屋

程敏政左諭德

汪君思恭性嗜書甚於衆之嗜利予嘉其志為賦四絕以訂晚歲之盟焉

飽看青山讀古書無人能識市中儒朝朝賣藥歸來晚留得芸香辟蠹魚

松蘿閣下築書室滿架牙籤一逕苔幾度新詩生眼底不

知以色近人來

王孫瀟灑皂綸巾獨起高軒出市塵見說年來書更熟門前常有問奇人

秘府圖書閱半交故園松菊可全拋何時更約開新社與子山中共結茅

贈別汪克和

程敏德字克倫號在菴

成化庚子予友汪君克和復上太學適當大比因集古

二絕為贈以期之幸勿誚焉

又勞行役出秦關司空圖擲下離觴指亂山章碣日暮酒

醒人已遠許渾明朝相望路漫漫賈至

日邊紅杏倚雲栽高蟾風靜寒塘花正開劉滄聖代牧人

無遠近薛逢懸知獨有子雲才王維

讀越國公傳以下五言律

楊氏乾綱紊英雄駭鹿馳手提三尺電身撫六州師奉表歸真主榮封寵誥辭洋洋遺澤在江漢浩無涯

越國公祠方震淮南運使

勲業標青史靈祠下瞰河威名千古大受賜數州多殿暗生雷雨人驚出薜蘿登臨來祭者疑向岳中過

烏聊山登覽方回字萬里號虛谷

香火雄三廟樓臺冠一州逝川無晝夜喬木自春秋竇氏元歸洛番君卒在劉蘭亭復行世簫鼓歲推牛

成化丙午五月二十一日陪克和訪汪知州溇引

謁八公忠祐侯墓

程隱 漢川人

登源山列戟間氣產羣英佐父揚神武勤王定太平舊碑
殘雨蝕幽隧暮雲橫賢胤躬同謁難禁吊古情

葺書樓

孫次臯 治山人

聞說樓居好圖書積五車絕勝楊子宅寧讓鄴侯家辟蠹
收芸草囊螢剪絳紗祇今功業就聲譽滿京華

題簡翁齒德卷

汪行素 大畝人

皎皎人中傑璠璵絕點塵衣冠饒古態齒德邁時倫偉望
三芝秀清談四座春漢庭急遺老還擬駕蒲輪

挽汪德民

黃天 古林人

震壑驚風起那堪梁木顛窮須帝古樹悲鶴淚新阡感里

猶稱德平亭父著賢幾回思慕處殘月墮寒天

謁王陵 詞律下七

汪澤民 尚書

錦帆忘返干戈起天產英雄定六州唐誥表忠垂宇宙宋

臣編史失春秋風雲神異來車馬祠廟烝嘗拜冕旒讓德

固宜綿百世昭陵何處問松楸

題忠顯廟

何坦

煬帝南遊鼎始遷羣雄蠱起競相挺九州魚肉千門淚六
郡雞豚萬井煙天啓唐家新日月地封越國舊山川伯圖
王佐都休問試問靈祠今幾年

題富山廟

胡雲峯

蚪鬚人去鹿歸唐多少英雄失故鄉昔日六州曾捲上此

邦上載尚尊王高陵夜雨鳴弓劍原廟春風潔豆觴
萬家元夕後誰悲狐兔滿連昌

勸忠樓

崔鷗 宋人續溪室

聞說驪龍睡九淵覺來頭角去升天官封越國三千戶
血食新安五百年錦軸尚標唐歲月彩樓重建宋山川
枚藏石匣非無意留與江南野史傳

勸忠殿

汪徐

赤手揮戈衛一方生民按堵便歸唐立心元不圖疆土
褒德應須錫玉璋血食無窮天地老威靈有赫古今長
東風樓下人翹首耿耿文光烜日光

登源八景并序

吾居去縣治之東南十里前有溪右有登嶺嶺麓有川南流與溪水相合因名曰登源源之南北峯巒環列岩洞虛豁始祖司馬公墓忠烈公廟咸在焉居之四圍有龍鬚高峯石泉飛溜每見停雲有三島懸崖林谷深邃常若積雨有隱張之岩巒阜凌層蔚然竒持有富陵之峯屏嶂層疊萃然峭拔有金山之霧靄乎烟霏有綠照之波瑩涵秋色沙鳥浮於清溪有志機之情松風響於塋塢有翠濤之聲九若此者不必出吾之戶庭而幽窓一開舉集目前亦勝槩也時或幅巾杖屨携琴載酒望高峯之晴雲沐島崖之

春雨陟層巒度疊障
灑香霧浴秋波
倦則隨沙鳥
詠松風而歸焉
充然自得其樂
有不可語人者矣
抑嘗聞之
瀟湘有八景之詠
宗元有八愚之詠
顧余出處雖不與之同
而玩物適情要之亦無異也
因名其景而系以八詠云

天順庚辰八月初吉
橘庄居士汪祐清序

龍峯晴雲

龍峯高高青接空
上有石井騰蛟龍
碧雲潑潑靄靄流
泉脉脉垂長虹
朝雲暮雲終不改
人間好景年年在
何當從龍化作霖
潤田枯槁蘇蒼生

金山曉霧

金山石壁高崇崇
曉來香霧何空濛
初訝輕紗隔寒水
忽疑佳氣浮簾櫳
瞳瞳日映丹霞爛
縱有長風不飛散
忽聞玄豹三兩聲
樵歌一曲難為聽

島崖春雨

懸崖窈窕深更深
寒雲冉冉凝春陰
有時飛出萬點雨
簾纖落地皆甘霖
坐來漸覺青山遠
微風動處珠簾捲
雨兮如知時
先我公田及我私

綠照秋波

一潭秋水青於苔
四圍山色同徘徊
波光瀲灩流不去
水壺掩映參差開
照我塵容深見底
此處人間能有幾
解纓一濯將奈何
臨風謾唱滄浪歌

隱張層岩

碧山差我峯上峯天邊削出青芙蓉上有些鞋襪遺跡相
傳仙子巢雲松我欲登臨發清興萋萋芳草埋幽徑梯雲
蹬石誰相從一聲樵唱來東風

富凌疊障

壁立層層溪上山山峯半入青雲間氤氳佳氣靄虛牖葱
龍翠色偏怡顏世間百物雖堪玩過眼烟雲容易散那似
此山如好人依依與我常相親

清溪沙鳥

溪頭水色浮晴空沙邊好鳥眠秋風相親相近飛還止自
去自來西復東紅蓼灘晴應並立芙蓉洲冷雙交翼鳴音

唱和如相求喧秋百鳥誰汝儔

楚塢松風

幽居哉得幾株松朝朝暮暮來香風北窓坐卧不知暑滿
懷情思何從容翠濤響處清陰重幾回喚醒丁生夢世間
惟汝耐歲寒吾儕與尔同盤桓

綠照亭

朱大同號朱陳村民

登源洞裏石如屋綠照亭前水作湖溪聲繞座驚風雨山
色界闌供畫圖身世幾時歸渭谷林泉何處不蓬壺高明
盡日追遊樂莫厭沾衣雨載途

藏書樓

胡初翁字徑存

君家別墅勝仙居百尺危樓萬卷書雲度碧牕湘帙潤月

生滄海翠簾踈青燈夜耿然藜杖芸草春香辟蠹魚自是
主人清致遠元龍豪氣未應如

松蘿清隱

孫陽

小築茅堂傍翠微花畦蔬圃澹相宜看耕每到龐公宅對
酒惟吟楚客詞春暖藥苗穿土早天寒雞犬出林遲松風
蘿月長如昨肯信功名鬢易絲

安貧卷

鄭厚

儋石無儲室罄縣正襟危坐日怡然破衾如鐵霜威重大
藥成金火候全顏子志寧甘陋巷伯夷心不改貪泉繩樞
甕牖宜風日讀到南華第幾篇

挽世祥汪處士

蘇大

仙夢迢迢入杳冥空餘鶴怨與猿驚藥闌不負平生志詩
卷長留清隱名窮巷夕陽悲故轍荒郊寒雨濕銘旌百年
人物誰能繼楊柳春來自滿城

又

孫陽

字士暉
以川人

蓬山夢斷海雲深蹤跡茫茫嘆莫尋林下有花猶泣露藥
爐無火不成金屋梁忍見蟾蜍影軒砌愁聞蟋蟀吟欲托
孤琴寫遺恨子期已去孰知音

挽汪簡翁

汪堅

字守貞
大畝人

西風一夕作威聲椿樹驚推慘客情詩禮尚還存教令衣
冠殊覺失儀刑鶯啼谷口愁春老鶴立庭臯恨月明且喜
賢邨名位近褒封指日到林垌

又

張旭

先生靈骨塋雲丘郎士元誰共芳樽話唱酬姚揆賓館盡

懸徐稚榻許渾客途空倚仲宣樓袁洋總殘夜月人何在

胡宿棋罷松陰局未收未獲令子克家成大用祝蕃請看

高步上瀛洲貢師泰

綠照亭

汪祐清號摘在贈知州

行年七十二春遊綠照亭不藉瘦竹筇步履猶清寧芳草
滿幽砌好鳥眠沙汀彼物各得所而我何勞形暖風天際
來冉冉吹踈櫺盤桓有佳趣相逢無白丁嘉賓倏然至為
我傾銀餅坐對情意洽狂歌醉復醒起看亭前潭照我雙
鬢青笑持一竿竹垂釣潭中鱗何必覓桐江此中清更清

安貧卷

程汝器

松蘿有佳士樂道良于醫已能三折肱茹木滄松脂安貧
事丘壑不為世俗移人生有至願何用千金資所以榮啓
期帶索理桐絲賢哉顏氏子前人乃吾師清風邀千古吾
子今見之勉旃崇令名贊詠無瑰辭

松蘿山清隱為應麟公題

汪敬初門人

休陽有佳士結屋蘿山下柴扉晝始開道書行尚把石泉
清可濯松風自瀟灑惟應洗心人寧識巢居者

又

蘇大

幽人愛情素避俗惟衣褐寄跡山水間無心問窮達閑讀
靈經咲睨天壤闊明廷斷紅塵四山翠如潑時有繡衣

人來作松下喝長歌招隱篇清風動毛髮

歲書樓以下七言古詩

程吉甫教諭漢川人

昔聞井幹高凌空嘔啞絃管多春風又聞麗譙天中起筵
開玳瑁客珠履何如汪氏歲書樓白雲一片映瑤几樓中
有客冰玉姿少年文彩珊瑚枝漁經獵史論王伯擷英摘
藻非淫離古稱鄴侯三萬軸况復君家倍增蓄湘簾半捲
月明秋坐對青燈恣夜讀讀書不獨攻文辭幼學壯行當
自期一朝省試魁多士錦標還擬奪當時辟雍養翮始未
展憶別松蘿今已遠幾回悵望白雲邊彷彿書樓夢中見

又

趙昉

東家歌樓高入雲繁絃急管清晝聞西家酒樓半空起越

女吳姬艷羅綺何如百尺歲書樓歲書萬卷樓上頭藜燈
弄影風雨夕硯池棲雲河漢秋樓中主者青雲客賣盡黃
金買書籍牙籤玉軸鄴侯家竒字玄文子雲宅一從挾策
遊京華文光高射斗牛斜幾回翹首僻雍上飛甍疊構天
之涯之涯迢迢歸未得六曲闌干楚天碧明當穩駕雙飛
鴻夜聽吾伊山月白

安貧卷

林尚友字思和山人

安貧子松蘿仙顏如美玉雙鬢玄早歲學讀岐黃篇耻與
壺公遊市廛曾言五材生六氣入與大道相周旋節宣失
度乃生疾我握元柄扶其顛青鞋布襪隨所適達官巨室
爭相延杏林成實虎為守摘井引水生靈泉千金酬功不

受報一瓢陋巷甘肅然安貧子聽我言清風一片首陽巔
窮達貧富非所憐方今四海沉痾痊民躋仁壽歌堯天安
吾之貧守吾分松蘿隱處人稱賢松蘿隱處人稱賢

又

釋以寧 普滿住持

玉帶溪頭珠林阿安貧隱者遥相過自言安貧子無他煩
師為作安貧歌歌時浩浩春正好展卷一笑即傾倒呼童
磨墨不停手解向風前一揮掃墨池花落何茫茫筆端點
染春風香春風之香引興長造化助我窮詩囊詩囊雖窮
不足數直是身貧道與伍道既亨時貧自安光輝照耀無
今古人生天地信有命富貴貧窮皆前定達者固是中心
恬恬然不與外物競我時曾到安貧家蕭然一室寂無譁

麻衣草座亦不惡藥爐試火烹春茶只消如此安貧樂樂
且無恙何趨廓可是身貧道不貧洞視乾坤一丘壑安貧
子誰賞音松風蘿月同清襟須臾寫就安貧吟還君歸去
瑞芝山下白雲深

又

古洪山人逢瞿

獨不見石崇金谷歌舞園豈知今日草芊芊又不見春申
門下三千珠履客豪華散盡一旦俱塵跡何如安貧隱士
家澹然隨分度年華榮不及辱不加數椽陋室樓雲霞倚
松蘿面玉几左圖書右經史粗衣糲食只如此有客呼為
安貧子安貧之樂應少知安貧之守固難為不是安貧貧
不得一毫無欲方能斯世或昧徒多顛倒好富嫌貧動非

道不知貧富總由天空自營營生熟惱我因訪舊抵休陽
山川佳麗非尋常喬木故家今視昔儒冠濟濟藹文章即
時走謁安貧所甕牖蕭然四環堵杏林春滿橘泉香盃紅
丹竈司龍虎已知先生種德深門無虛日踵相尋授藥不
思報贈金徃徃惟存濟世心我本山林消閑者懶逐炎涼
任踈野願言未結貧交遊相邀共入蓮花社

又

吳熙中璜原人

君不見古亞聖陋巷簞瓢俟天命篤志好學忘飢寒千古
斯文稱德行又不見杜陵老短衣露脛無憂惱得錢沽酒
不復疑得句吟詩任顛倒平陽仙客非凡才自眎富貴如
織埃手持紅杏種陰德掌握玄化生風雷心存濟利行其
素擲地千金不回顧蕭蕭四壁參苓香寂寂一簾風雨暮
我恨不得凭軒吟臨風一曲歌陽春願將真聖心為心古
來多是高人貧

蘿山清隱

蘇大

松蘿之山何差我攢巒聚嶠紛相摩清朝雨霽宛如畫白
雲堆裏擁青螺吾州山水自無比此山獨擅休陽羨秀色
平臨北斗旁嵐光半落市城裏人物由來鍾地靈嘉君早
歲播芳名讀書不求進士第遺意常偶幽人行林下一室
僅容膝仙籙遺書滿瑤席灌藥晨分竹底泉鳴琴晝拂花
間石有耳不受俗物喧有足不履權貴門儼如玉樹在深
谷後風搖暎春無痕安貧先生業巢許萬金不直一盃水

清時隱德見賢郎石與此山兩相峙君不見榮華過眼如
飄風至今猶慕鹿門翁

贈汪君克和還鄉

包應本弘桐人

先生世家新安之關西襟懷磊落標格奇瑩隄幾載飽經
史咲談咳唾成珠璣去年觀光遊

上國氣吐虹霓絢秋色于時我亦寓京師邂逅相逢始相
識荷君青眼情如舊不特論文醉樽酒客邊未盡平生歡
賸欲相親又分手自君點額歸故鄉相思兩地成參商停
雲幾度對春樹無由會晤徒心傷今年買舟來吾桐倏爾
千里忻相逢呼童下榻儘歡咲任教林外斜陽春雅懷一
時開展席聊為好滿傾金屈卮不覺玉山倒酒進君莫酣

我歌擊碎玻璃盤從他世事如轉軸長嘯起舞天何寬君
醉我亦醉兩意綢繆不成睡話又那勝竹院涼玉露溽溽
滴空翠先生侗儻才手握春秋筆試看挑浪香九霄騰健
翼願早展經綸摠忠扶
社稷嗟予樗櫟濫竽

朝廷職庸才愧無補此心常戚戚締交固且深不啻膠投
漆正爾堅歲寒况復歸思逼去去君莫留薰風馬蹄疾明
朝天一方感慨情無極固知聚散不可量離愁渺渺江茫
茫沙頭酒盡意難盡何時復會與君重醉花前觴

松蘿書屋

程敏德詹事府簿

經文君家三萬軸羨君過目不再讀為嫌塵事日紛紛特

向松蘿結茅屋屋外青山屋內書應知隱德重璫與佇看
此後非熊兆光被東山舊草廬

又

黃莆 古林人

縣城城北松蘿山重崖複磴白雲間聞君於此築書屋避
地便覺非塵闕浮嵐映席色冉冉懸水掛樹聲潺潺左圖
右史甚儼雅幽探古汲忘辛艱軒裳自識泥塗辱富貴終
比浮雲閑賈傳長沙悲共諧班侯西域求生還何如高居
罷聞達不許俗子來躋攀猴王秋食林栗紫鹿女春踏壇
花殷幽懷蕭散足為樂佳興杳眇長不慳嗟予欲往共傾
倒恐訝生客敲柴關

松蘿書屋

程文通 字號
友雲

汪君高隱蘿山麓蘿月松風恣夜讀虹光已射斗牛墟豈
但三年不至穀甚矣張華三十乘幄我鄴侯三萬軸茫洋
何處是通津渡落盡將載其腹苦下董生幃幽開鄭公谷
白雲繚繞芸芬馥豈容俗客日敲門祇有書聲時出 人決
生安可期老大富刮目竹杖芒鞋時往復吳來展卷為題
詩啼鳥一声山水綠

寄宗兄克敬


汪度 卷五宗人
真建士人

百里不辭遠勤渠過祖居從頭拜坵壠握手步郊墟情叙
一樽酒言談我卷書本源能不忘眼底孰君如

汪氏詞翰卷終

忠 祐 侯 俊 公 墓

墓在績溪縣登源汪村大園



宋處士四七公墓

墓在績溪縣仁里七塔




宋處士彦一公墓

墓在績溪縣洪坑塘子塢金釵插
子八十公墓葬同處右傍
形有粧臺案



宋真秘閣德彰公及夫人曹氏墓




墓在休寧縣二都十保車田洪武經理歲字二
一百六十一號土名山克山三角
友成田南至路西至
人曹氏同穴璫公及孺
汪楫卿

宋 解元紹公及孺人金氏墓

墓在休寧縣二都茆司徒孺人金氏同穴庚公
府午公俱葬同處餘山失業



元處士群及孺人吳氏墓



應祥繼娶吳氏汪思端俱去
至自由北至程文得山孺人
一號山四分東至尖南至王家
在寧縣二都低嶺山洪武經理

元慶士永昌及孺人劉氏墓



休縣二都茶曹坑經理冬字

十四號山壹畝伍分陸厘東至本

曹家田塘西至汪祖玄田

世祥公及孺人李氏應

吳氏奉孺人王氏使小娘

俱葬全處業汪世祥應祥

